

1 Pita

Pitayelen zapat meluwan ņeņangatnaņ

Zapat meluwan kapi Pitayan kuye. Ek nemba Zisasiyan elengolamaņ tazulutme kumtetime kwitnaņ kwitnaņ mulaloņ pemti Zisas mâpmege (Luk 5:1-11). Ma egaņ Zisasimak maņgeen zet abatatatnaņben. Zet notnaņ an ņenaņ ku zenzeyelen egaņ ilak abak zewaņgut zet ilak penaņ zeye. Egat mulup zet Zisasiyan omba ņenaņ zemsaye.

Pitayan zet kapi am Zuda maņgeengatnaņ nâmkiņpepeņinmak kelaņ kumti msat sambe mebet kokotnaņ ekņengat zet kapigok kuye. Ekņenmagen nukņaņ sokbewe keyet weyeyaņ mulup mtabep keyepmti sisipeņpeņ mimindawep ma nukņaņ sepem iķņak iķņak sokbemindame gwaņ gwaņ kumti tabep. Ma naman mopmanegak yaņbemti Kilais kokotnaņgalen weyaņbe weyaņbe mulup eweņanegak mti tabep.

Pitayan zet kapi Loma msalen tati kuye kan keyet msat Loma keyelen kwitnaņ ņen Babilon kuwien enenogat nukņaņ dapmelaņge ekņen yaņbemti tiwewen ke sakam itnaņaņ Kawawaņgalen amnaņ nukņaņ Babilon msalen tati tiwienok katan. Kegogapmti Pitayan ekņenaņ eksemti tatagat zapat meluwan kapi kumindaye.
Zet ņotekņaņ temaņ kapigogaņ 1 Pita zapat meluwan keņa talip:

- 1:1-2 Zet yanbemti zenzeyelen zet
 1:3-12 Kawawaŋaŋ ndaangalalaŋgalen keŋ
 mwat zenzeyelen zet
 1:13-2:10 Teŋ mama keyelen zemgwatnaŋ zet
 2:11-4:19 Nâmkiŋpepemak ekŋenmagen
 nukŋaŋ ma sisipeŋpeŋ sokbeme zigoset
 epumti tatatgalen set katnaŋ bembenaŋ
 5:1-11 Nâmkiŋpepemagen keŋ mtoti mama kat-
 nanen zigok mamayelen zetnaŋ
 5:12-14 Zet zemdelaŋ zenzeyelen zet

¹ Neŋ Pita Zisas Kilaisiyelen mulup an mamti egalen Zet Zapat Dolakŋaŋ Penaŋ zemkawaŋ bembeyelen nâmti nakumtetiyeŋaŋ zet zapat meluwaŋ kapi Kawawaŋgalen animbi mukupnok msalin peme tapme kilenŋ Pontas ma Galesia ma Kapadosia ma Esia ma Bitima Plowins ekŋen keyet keŋaŋ mamaip ingat bema kozin.

² Kawawaŋ Bipmnaŋ ikŋaŋ nâme wenŋe katanŋ in indakumtetiye. In Emetak Teŋaŋ keŋin mme teŋ penaŋ bembeyet ma zetnaŋ gawepumti mamayet Zisas Kilaisiyelen sipmaŋaŋ zulutindeye. Inmagen Kawawaŋgalen keŋ taolet ma keŋ sewaŋkaŋ sambelenŋti weweyet nâmti mandun-
duyap.

Webe webenn Kawawaŋmagengatnaŋ mama kanzizit tiwanup kemagen bemti mamambanup

³⁻⁴ Egaŋ Zisas Kilais gakikiengatnaŋ mme wage egaŋ ningat keŋaŋ beme nin ekgapmti mama mimi alakŋaŋ aŋgalaŋ gogotnaŋ temaŋ

penañ tazin keyet penañañ Kawawañañ kot nda-time mebegalen damuñ webematatnup. Kulu-luñgalen milombi lombi ku sambumbuyelen ma yomgalen zukulak ku niniñañ ma kok bilin bilin ke ingat zapat bempepenañ tazin ke maneti in toñañ bembeyet kegek mge keyepmti nin Kawawañ Amobotnañ Zisas Kilais egat Bipman masesewatpemambanup.

⁵ Mti Kawawañ winde toñañañ winde indame in nâmkijpepeen katikñañ bemtati mane peme msalen mama kan delañ zeme milombi lombiñin kalan kumti bembenañ ke toñañ bemambepgat zapat añañindeye. Kawawañañ toñañ bemti mambepgat zeye ke bamgat Kawawañañ iññañ msokbewe.

⁶ In keyet oloñen palen mamambep. Ma Kawawañañ nâmindeme nukñañ palen moti keyet kember palen mambep keyañgut keyañ kan isikñañ bugan tabeyet nâmisimti mambep.

⁷ Nâip, gol ek ñep yek bembeyelen yañañañ tep keñan toti mamsokbein. In nâmkijpepenin penañañmak penañ keyet yañañ nukñañ sokbemindame keyañ mkawañ beme Zisas Kilais kokotnañ kanen inmagen keñ sekñeyak ma sese-wat ma elimiak miak sokbemindawe.

⁸ In Zisas Kilais ek sek sepemañ penañ ñep ku ekbienañgut gogot etañ mamsaip ma kan pigogat zikalinañ penañ ku ekti belak etañ manâmkijpeip. Mti olim sesewat mobotnañ iga-gen penañ manâmsaip

⁹ keyepmti nâmkijpepeninañgat penañañ Kawawañañ bamgat añañindewe.

¹⁰ An golañ zenze an ekñenañ Kawawañgalen

keŋ taolet inmagen alak tasokbein keyet zetnaŋ zemkawaŋ bemkwabien. Ekŋenaŋ Kawawaŋaŋ gilik zemindatiwe zet keyet yaŋaŋ nâsâgât mulupmaŋ omba penaŋ mbien.

¹¹ Kilais ek sindem nâmeti bam gakikiengatnaŋ wati mama mundum zapatnaŋ Kawawaŋgât betnaŋ penaset windeen moti tiwe keyet zet Emetak Teŋaŋ golan zenze angat keŋinan beme ekŋenaŋ kan zukŋaŋ penaŋ ma kwitnaŋ kwitnaŋ ziboŋaŋ tasokbeme Kilaismagen kogok sokbewe zemti ektitimi mamkwabien.

¹² An am yomengatnaŋ gilik zemindatitiyet mulupmaŋ mbe keyet an golan zenze an ekŋenaŋ zetnaŋ zewienen ilinmagen sokbesâpmme ku zewien. Ekŋenaŋ zet zewien keyet penaŋaŋ an ekŋen Kawawaŋgalen Zet Zapat Dolakŋaŋ Penaŋ timti inmagen kozeme Emetak Teŋaŋ kuluŋengatnaŋ toti zelin winde same in keŋ gilik zenze taegip keyaŋ an golan zenze an ekŋengalen zelin penaŋaŋmak sokbein kogok bein. Âpme Kawawaŋgalen ensel ekŋenaŋ kogogak zet keyet yaŋaŋ nânâyelen mulupmaŋ mamip.

Mama mimi itnaŋaŋ bekanaj bamkumpemti alakŋaŋ mbep

¹³ Kogogapmti Zisas Kilaisiyaŋ gilik zemkoti keŋ taoletnaŋgât aŋgalaŋindewe keyepmti in keŋin kume kwaopme keŋin sekŋin ekdamaŋ mti nâpeŋ nâpeŋ tati webemti mamambep.

¹⁴ In animbi Kawawaŋgalen zet gawepumti mamaip. In eweŋaŋ nâmkiŋpepepiŋ mambi- enen kwitnaŋ kwitnaŋ bekanaj msâgât keŋinaŋ

puṅpuṅ mamtemien. Kan pigogat mama mimi bekanan ke ewe ku mâbep.

¹⁵ Kawawan ek teṅ penaṅ mamain egaṅ indakumtetime kobien keyepmti in mama mimi teṅ mti egaṅ mamainok mait.

¹⁶ Kawawanḡalen Zet Itnananen meluwan kapigok mimiṅaṅ,
 “Neṅ teṅ penaṅ mamayap keyepmti in kegogak teṅ ṅegak mambep.” (*Wok Pris 11:44-45; 19:2; 20:7*)

Kawawanḡaṅ tosa temaṅaṅ ndakwitimti gilik zemndatiye

¹⁷ Kawawan ek am kwizet buṅaminmak ma kwizet buṅaminpiṅ keyet ku manâin. Egaṅ amgat mama mimi zigok tazin keyet katanḡ ekti zetn manzemdelaṅ zein. Keyepmti in egat, “Bien” zemti mukulem mimiyet dundumsawep beme msalen kapi mamti ek eksempemti masesewatpe-mambep.

¹⁸ In kapigok ṅep nâmtalip, in eweṅan yeṅsokṅine ekṅengalen mama mimi yaṅepiṅ bekanan ke timti mamkwatnepeme gilik zemindatitiyelen tosaṅin gol ma silwa yek bemberaṅmak keyaṅ ku indakwititiṅaṅ.

¹⁹ In Kilaisiyet sipmanḡ tosa temaṅ keyaṅ indakwititiṅaṅ. Kilais ek sâpe sâpe bumbuyelen sipsip keboṅ lingit zemberēpiṅ ma kwetetepmanḡ penaṅ.

²⁰ Ek eweṅan msat kululuṅ ewe sokbembepiṅ tapme mulup zet ke mimiyet zempepeṅaṅ. Yaṅ kan ke daṅgome Kawawanḡaṅ peme totmamti gakimti wage ke ingat nâmti kegok mge.

21 Mti Kawawaŋaŋ in ekmak tusumindeye keyet nâmkĩnpemti maip. Kawawaŋaŋ ikŋaŋegak Zisas gakikiengatnaŋ mme wapme mundum zapatnaŋ ikŋaŋgat betnaŋ penaset windeen mopeye kegogak in Kawawaŋaŋ ikŋaŋ kot ewe indadagat webematalip.

22 In Zisas Kilaisiyelen buŋam zapat penañ kapi zemti gawepu mmame keyaŋ kenjin mme kwetetepmaŋ beye. Âpme in Kilaisimagen noline-mak gogot penañ mti mamaip keyepmti in keŋ kwep penañ bemti mama ke gogot palen giŋgiŋ mti mbep.

23 Kawawaŋaŋ mama alakŋaŋ indayeen keyaŋ ingat dukŋin alakŋaŋ epeemti kwage keboŋ. In alik alik yek bembeyelen keyetnaŋ yek. Alik alik kwesiŋ matakwazin keyetnaŋgatnaŋ epeemti kwabien. Kawawaŋgalen zet mamaŋaŋmak ma wemeti wembe keyetnaŋ epeemti kwabien.

24 Kawawaŋgalen Zet Itnaŋanen zet kapigok kukuŋaŋaŋ tazin,

“Animbi alik mamaip ekŋengat mamaŋin tep msikokok keboŋ ma elimiakŋin ke tebilalik katnaŋ keboŋ. Tep msikokok ekŋen kasuwan indikme maŋgasip ma tebilalik katnaŋ ekŋen mandâlân zemti tolip.

25 Kawawaŋgalen zet katikŋaŋ keyaŋ wemti wembe penañ.” *(Aizaya 40:6-8)*

Zet kapi zet zapat dolakŋaŋ diindondoŋaŋ e penañ ilak kapi zemkawaŋ bembenaŋ.

2

1 Kegogapmti in kwitnaŋ kwitnaŋ bekaŋaŋgat keŋin puŋpuŋ kapigok ku mbep: ammagen kwit-

nañ kwitnañ tisât dâsuki tetimaem titi ma zet nambalam zut zenze ke ma keñ kuku ma no-lineyet zet okzep tazep mee ku mbep.

2-3 “Amobotnañ Zisasiyelen keñ taolet inmagen sokbeme egoyet,” *(Sam 34:8-9)*

mama mimi keboñ ke time temepme animbi namba okak namgat maindemben sepem kekok in Kawawañgalen zet mme namnok dolakñañ penañ niniyelen tikñañ penañ nâmti mamambep. Kekok mme Zet Zapat Dolakñañ Penañañ nâmkijpepenin mme semem katikbewep.

Zisas ek tepum miñañ ma egalen am mañge kogogak tepum isisikñañ

⁴ In Amobotnañ Zisas ek tepum miñañ mamañañmak am ekñañ ek ektalati peme meweñge yañgut Kawawañañ ekme pmbenañ penañ beme mwatonzempeye ekmagen wetekumti tabep.

⁵ Mti in tepum kaliñañ nembonñ tati mka bandim mme tatagalen Emetak Tenjañ ingat keñinan tazin kogogapm Kawawañañ in tim tusumindeme ikñañgalen am mañge kwetetepmañ ikñañgat zapat ondekindeye. Keyepmti in kwep kwep ilinañgat sâpe sâpe bumbu mulup mimiyelen ke an Zuda am ekñañgalen sâpe sâpe bumbu anañ ammak Kawawañgat tunguwinanen tati mamtemien sepem kekok in mimiyelen. Zisas Kilaisiyet pmbenañgat amgat tunguwinan mulup mamip ke Kawawañañ nâmtikñañ mimiyet mamip.

⁶ Kawawaŋgalen Zet Itnaŋanen zet kapigok zenzenaŋ tazin,

“Egit, neŋ tepum miŋaŋ ñen mka mme kaliŋaŋ bembeyelen dolakŋaŋ penañ ombempeyap. Neŋ tepum miŋaŋ ke Zaion Kalaŋan* onzempema tazin. Keyepmti an ñenaŋ tepum miŋaŋ mamaŋaŋmak ke nâmkĩŋpewe beme bam sakambuk ku mbe yek penañ.” *(Aizaya 28:16)*

⁷ Âpme am tepum miŋaŋgat manâmkĩŋpeip ekñaŋaŋ tepum miŋaŋ ke ekme mobotnaŋ beme Kawawaŋaŋ kogok mamipgat nâmindeme pembedaŋ mambeip. Ma Kawawaŋgalen zelaŋ am ku nâmkĩŋpeip ekñaŋgat kapigok zenzenaŋ,

“An mka walalat ekñaŋaŋ tepum miŋaŋ ñen ekme bekaŋaŋ beme wisat mti peme mewenŋe tepum keyañ tepum miŋaŋ beye.” *(Sam 118:22)*

⁸ Ma Kawawaŋgalen zelaŋ am ku nâmkĩŋpeipgat kapigok zein,

“Ekñaŋmagen tepum keyañ uluk galuk beme ime ulukpeme waleletgat zapat bewe ma tepum miŋaŋ keyet palen setetek mti toindondoyelen keboŋ bewe.” *(Aizaya 8:14)*

Ekñaŋaŋ Kawawaŋgalen zet kulume zet keyañ selin kaikme toindowe keyepmti zet kululuŋinaŋgat tosaŋaŋ kegok sokbemindawe.

In Kawawaŋgalen animbi bewien

* **2:6:** Zaion Kalaŋan keyet kwitnaŋ ñen Zelusalem mka temaŋ.

⁹ In Kawawaŋaŋ iŋŋaŋgat amŋane indaombe-mindeye. Ma in kwep kwep kogogak Amobotnaŋ winde toŋaŋ ma amŋane ekŋengat tuŋguwinan mamti dundundu ma sesewat mulup mimiye-len. Ma in kegogak Kawawaŋaŋ am maŋge kwetetepmaŋ temaŋ ondekindeye. Ma am iŋŋaŋgat zapat nâmsemtenŋ mamayet zeminden-deŋaŋ. In keboŋ ke tambusosogengatnaŋ timkwat iŋŋaŋgalen busatnaŋaŋ ego egoŋaŋmak keyet keŋan indeyeyepmti in keyet kwit zapatnaŋ zem-palakŋaŋ bewep.

¹⁰ Eweŋan in animbi Kawawaŋ ku nâmâtâtpewien. Yaŋ alak pi Kawawaŋgalen am bemti mamaip. Eweŋan Kawawaŋgalen aŋgalaŋ gogot ku tiwien. Alak pi Kawawaŋaŋ aŋgalaŋ gogot mimindain.

In Kawawaŋgalen sisiliŋ an kegok bemti mamambep

¹¹ Notnne penaŋ, pigok zema nâit, in msat kapiyelen am yek. In am mukup ma lueŋset tapmaip keyepmti msat kapiyelen mgasikgat tikŋaŋ nânâ keyaŋ indamandame toweti walebepgat ek-semti mamambep.

¹² Mti am nâmkiŋpepeŋinpiŋ ekŋengat tuŋguwinan mamti mama mimiŋin weyaŋme teŋ beme mti mamambep. Kegok mame am nâmkiŋpepeŋinpiŋ ekŋenaŋ yaŋaŋin ekmâtâti bekaŋaŋ mimi mandiindoip beme ingalen mama mimiŋin dolakŋaŋ ke ekti zet bekaŋaŋ ke peme tapme naman ekŋenaŋ kogogak Kawawaŋ nâmkiŋpeme kan keyet ilinsakwep ek sesewatsawep.

13 Msalengalen amobotnaŋ sambe ekŋengat kandeninan mtoti mamti ekŋenaŋ in set notnaŋ mâbâgat katnaŋ beme Amobotnaŋ Zisasiyet kwizet buŋamaŋ mmobogalen nâmti in kekok mimindawep. Msalengalen an mobotnaŋ temaŋ kwizet buŋamaŋmak

14 egaŋ plowinsgalen amobotnaŋ ekŋen zemindeme kobiengat ekŋengalen zet eyo gawepume delaŋ penaŋ bemâbe. Ekŋen ke am bekanaŋ mimi ekŋen zemindondoyet ma am dolakŋaŋ maip ekŋen zemsesewatindendeyet zemindendeŋaŋ.

15 Kawawaŋaŋ in am nâmkijpepeŋinpiŋ ekŋen mama mimi dolakŋaŋ mimindamti zemyuŋguŋguŋin mme yek bembeyet ingat mulup zet ke manzemindain.

16 In lala indendeŋaŋ ewan in bekanaŋ mimiyet nâmti ku indendeŋaŋ. In lala indendeŋaŋ ke Kawawaŋ sisiliŋ msasayet nâmti indendeŋaŋ.

17 In am sambe ekŋengat nâmindeme mobotnaŋ bemâbep ma noline nâmkijpepeŋinmak maip ekŋen gogot mimindawep. Kawawaŋ eksempepti an mobotnaŋ temaŋ kwizet buŋamaŋmak ek kogogak nâmpeme mobotnaŋ bewe.

Nin Kilaisiyelen mama ke mâti sindem tiwanup

18 Sisiliŋ an, in amobotnaŋine ekŋengat nâme mobotnaŋ beme zelin gawepuwep. An mobotnaŋ zet sewak sewak mamip ekŋenmagen etaŋ yek notnaŋ mgasik ŋenzinziŋinben, ekŋengat sepem kwep kekok mbep.

19 Ekñenañ belak yompiñ tungupman sindem indame in Kawawañgat nâmti keñ kasapiñ sewakñañ mame Egañ nâmindeme dolakñañ bewe.

20 Yanğut ñenañ yom aikme keyet dopmañ kume keñ kasapiñ tabe keyet kwiyañ zemesewatpewe? Yanğut ñenañ yompiñ teñ mame ekñenañ kume nâmisim matazin keyet Kawawañañ nâme dolakñañ mambein.

21 In sepem kekok ke mimindandayet Kawawañañ ombemindeyeyepm keyet penañañ manañinañ msokbewep. Kilais ek kekokak ingapmti ñeñañ bemindamti sindem tiye keyepmti in egalen set kaisatnañ ke ekti keyegak mâti mebep.

22 “Ek yom ñen ku mge ma dembusekñañgatnan dâsuki ñen ku toge.” *(Aizaya 53:9)*

23 Ek zemtalatpeme egañ dopmañ gilik zemti ku zemtalatindeye. Sindem same egañ dopmañ zet ñen ku diindoye. Egañ Kawawañ An zet zemde-lañ zenze teñ egat betnan keñañ ma sekñañ nâmtalasim saye.

24 Ningalen bekanañ sambe egat palen mopme pumepme tewen kumasasokpewien. Egañ ke nin yomgalen mama mimi katikpepeyet nâmti kekok mge. Kogogapm nin yom ke bamkumpemti mama mimi teñ ke mâti mamambanup. Egat sekñañ witikme dulun dilin zeye keyañ in mimindeme dolakñañ bewien.

25 Eweñañ in sipsip keboñ kilen lala mekoti mam-bien. Alak pi sipsip damuñ nemoñ Zisas egañ gilik zemindatimtikot ondekindemti indikdamuñ mme tapmaip.

3

Awembij ekñengalen zet

1-2 Keyet katan imbi awinmak in awine eksemindemti mambep. Âpme awin Kawawañgalen Zet Zapat Dolakñan Penanğat wisat mti mamain beme in eksemindemti esemteñ zetpiñ mame awinañ ingalen mama mimi dolakñan ma kwetetepmanğ ke ekti keñin gilik zeme Kawawañ nâmkijpewep.

3 Imbi, ingalen mama mimi awinañ egoñgoyelen ke sekñinañgalen elimiak miak kabonğ yek: ñokñin weyañ elimiakpemti maip ma kekek tosañanğ temañ dolakñanğ penañ andomti maip ma sañgum melakandu meluwañanğ dolakñanğ mundunğti maip ekñen ke segalen elimiak etañ.

4 Ingalen mama mimi ego egoñanğmak ke keñinan awineyet gogot omba penañ mimiyet Kawawañanğ bempaye. Elimiak miak ke ñep ku endeleletgalen. Miak miak ke keñ sewak palen mame Kawawañanğ mama kebonğ keyet nâme pembenanğ penañ mambein.

5 Nâmkijpepamak imbi tipman baen mamkwabien ekñenañ miak miak sakam kebonğ ke mti mamkwatemienen webebenjin Kawawañmagen tapme mamti awine eksemindewien.

6 Ekñenmagengatnañ imbi kwep ñen kwitnañ Sela egañ apmañ Abalaam ek eksempemti apmañğat nâme mopme, “Amobotnañğ,” zema mañge. In Selayet nambañenenok besât mip beme in mama mimi dolakñanğ mti awineyet ku kiñgabep.

⁷ An, in imbi ekñenaj maeksem indeipnok imbiñine eksemindewep. Enenogat it ilisakwep mama kanzizit mamayet Kawawañaj taolet mimideye. Keyepmti imbiñine windenjinpiñ ke nâmtatiyepm indamukulem mbep. In kekok ku mbep beme dundundunjanagat setnaj bekek tabe.

Nin keñ kwep bemti mambanup

⁸ Zet pigok ondekti zema delanj zek, in sambeyanj keñin kwep bemti mambep. Ñenanj ñeniyet kembeñ ñenanj ñeniyet kembeñ mti noline nâmkijpepeen gogot mimindawep mti keñ taolet mimindamti keñin mtoti mambep.

⁹ Kwitnaj kwitnaj bekananj mimindame in kwitnaj kwitnaj bekananjak ku gilik zem mimindawep. Ekñenanj zet bekananj diindome in zet bekananjak ku diindowep. Kawawañ dundum same mukulem mimindewe. In mama mimi keboñ mti mamayet Kawawañaj maindakumtetiin. In kekok mti mame egañ keñ taolet mimindawe.

¹⁰ Kawawañgalen Zet Itnananen zet kapigok tazin,

“An ñen nâmkijpepemak mama ke penañanjmak bembeyelen nâin ma kan katanj oloñen palen mamayelen nâin beme egañ dembusekñanj damuñ mti zet bekananj ma zet dâsuki ñen ku zewe.

¹¹ Kegok mamayet nâambe beme egañ bekananj bamkumpemti kwitnaj kwitnaj dolakñanj ke mbe mti keñ sewakñanj palen mama ke windenjanbeñ mbe.

12 Amobotnaŋ zikatnaŋ am mama teŋ penaŋ mamaip ekŋengalen mamaŋin maekmâtâzin. Amobotnaŋ egaŋ am mama teŋ penaŋ mamaip ekŋengalen dundundu nânâyet wak mambein ma am bekanaŋ mimi ekŋen indik kiŋgati mambamkumindein.” *(Sam 34:12-16)*

Sisipenpeŋ mimndame nâmisimtabanup

13 In kwitnaŋ kwitnaŋ dolakŋaŋgat nâmtikŋaŋ mti mame an ŋenaŋ ku indawaleletgalen.

14 Yaŋgut mama mimi dolakŋaŋgapmti sisipenpeŋ palen mobep keyet olonŋen mbep.

“Kasayet sebet dindiŋ mti windenjin ku kalube.”
(Aizaya 8:12)

15 Ma ŋen kapigok keŋin kume kwaopme Kilais Amobotnaŋgat zapat penaŋ bemti tabep. Âpme in nukŋaŋ timti nâmisim matalip keyet yaŋaŋgat nânâyet indayaŋkwesime in zemâtâtindasâgât weyaŋ ekmâtâtî sewak sewak kapigok diindowep, “Kawawaŋaŋ mandamukulem mme mananup.”

16 In keŋin kwetetepmaŋ penaŋ weme am notnaŋaŋ ingat zet bamset zewep beme in Kilais mâpmaipgapmti am ekŋen zet mobotnaŋ mbep ekŋen ke ingalen mama mimi dolakŋaŋgat bekanaŋ manzewaŋ eksokbemti sakambuk mbep.

17 In kwitnaŋ kwitnaŋ dolakŋaŋ mme sisipenpeŋ mimindawep ke Kawawaŋaŋ inmagen kekok sokbembeyet nâme kozin beme ŋep. Âk in yom mme keyet sindem indaip beme ke yominanŋat dopmaŋ kogok nâmbep.

18 Kilais ek yom nen ku mge yangut egan bekanangat dopman sek kwep gakime delan zeye. Ek An ten penayangut nin bekanan mimi ningalen yomgapmti gakimti Kawawanmak tusumndeye. Ek am sekmak mange manepeme kume gakiye apme Emetak Tenanan seknan gakikiengatnan mme wage.

19 Apme Kilaisiyelen Emetaknanan am gakiwien wenin mka kalinan tabien eknenmagen meti Kawawanhalen Zet Zapat Dolaknan Penan diindoye.

20 Eknen ke Noayan wanga maweyankwapme Kawawanan ken taoletnangapmti eknenan ken gilik zenzeyet damun mamkwage yangut eknenan zetnan kuluwien. Apme animbi 8 etan wangaen mowepme tuyan mimindeme tu palen mme mekoti alik mambien.

21 Tungwam kwati am sambe indapminzilime tu nimbien mme tu keyan negak Noamak nemunaninane ekngalen wanga tuyan belan zem mmange sepem kekok am Kilais namkinpeme tu manzulutindeip eknen ke Kawawanan maangalanindein. Tu manzululip keyan sekgalen mubulup ke manzulupme kwawezin yek. Keyan keninan Kawawan manamkinpeip keyet pilinan kogok manzulutindeip. Kawawanan Zisas Kilais gakikiengatnan mme wage keeset maangalan indein.

22 Mti iknan kululunen mogeyan Kawawangat betnan penaneset windeyelen mundumen to-tazin. Ke tapme ensel windeniben sepem iknak iknak msat taga tungupman maip eknen Zisasiyet kandenan tatagat Kawawanan namindeme talip.

4

Nin mama mimi bekanaj pemann tapme Kilaisiyelen mama pembenaj ke mâbanup

¹ Kilaisiyan am sekmak manjeen kan keyet ningat nâmti sek sindem tiye. Kegogapmti in sek sindem tiwegat weyan mambep. An nen nâmkijpepenangat sek sindem matin keyan kaliyan bemti matazin ma bangat tetimae nen ekmagen sokben beme yom mimiyet tiknan ku manâin.

² Mme msalen mama mamain katan amnan yom mimiyet tiknan taindame mamip kebon nen egan ku mbe yangut egan Kawawanaj mama mimi nâmtiknan mam ke etan mbe.

³ Tipman baen nâmkijpepeninpin mamti mama mimi kapigok mmamkwepbien: imbimak set kilej mama ma bekanangat kejinan puñpuñ mimi ma tu katiknan nimti kilin kalun palen mama ma bo meu time kwaopme nimwianji keyet kejaset âmanda manda palen mama ma tu katiknan omba nimti kejin kilom beme mama mimi bekanaj mimi ma nopiom notnan sese-watindanup zemti keyet kejaset mama mimi okbi okbinajmak mimi ma kwitnan kwitnan ke mkwabien ke peme temelak.

⁴ Âpme in kan pi am nâmkijpepeninpin ekjenmak tusumti ku mamaip keyepmti ekjenan nâme in mama mimi bekanaj ke ekjenmak tusum mbiek zemti ekme in ekjenmak tusum ku mamaip kegogapm ingat nenzinziñ omba mti zet bekanaj mandiindoip.

5 Yanjut ekņenaņ maneti Kawawaņ am gakiķinaņ ma am alik mamaip yaņaņ msokbembeyet damaņ matazin egat zikatnan an kwep kwewaņ yaņaņin zewep.

6 Kogogapmti am Kawawaņgalen buņam zapat zenze an ekņenaņ am gakiwien ekņen Kawawaņgalen Zet Zapat Dolakņaņ Penāņ diindondaņaņ. Ekņenaņ msalen kapi mamti sek sindem tiwien mti nembetnaņ zemdelāņ zenze kanen keyet tosaņin tiwep ma emetakņinaņ Kawawaņmak meti mama kanzizit mambe keyet temakwep zewien.

Kan bududuk beingat nolinemak gogot palen mambep

7 Kan bududuk beme kwitnaņ kwitnaņ sokbembeyet zenzeņaņ ke tasokbeingapmti dundundu mulup mene mene mimiyet keņinaņ weyaņ nāmâtâti esemteņ talip.

8 Gogot palen mama ke mama mimi dolakņaņ notnaņ sebempein keyepm nodāņgalen yomaņ sambe kwatampeme tapmâbe mti ekņengalen yuņguņguņin keyet kogogak kandaindowe.

9 In noline mkaen indamandame kopme timbuluņ indasâti zet kutuk palen ku mbep.

10 In Emetak Teņaņ taolet sepem ikņak ikņak indaye keyepmti taolet ke tim tati am sambe indamukulem mimi ke peme tatapiņ mti mimiek mme Kawawaņ taoletōņgapm keņ taolet ikņak ikņak ketalasim maindain.

11 An ņenaņ Kawawaņgalen zet zapat zesâti egaņ Kawawaņaņ zetnanen egalen zet zenzeyet zemâtâtpepeņaņ mâti nâmdelaņ zemti zewe. An

nen mukulem mimiyet taolet sasaŋaŋ beme Kawawaŋaŋ winde same keyet kataŋ mbe. In kwitnaŋ kwitnaŋ Zisas Kilaisiyet pembenangat kegok mme Kawawaŋgat kwit zapaŋaŋ mmobe. Kawawaŋaŋ Zisas Kilaisiyet kwizet buŋamaŋ mme mmoti Amobotnaŋ tataŋat winde same egalen winde keyaŋ kwesiŋ kwesiŋ tapmebep. Ke penaŋ.

Zisas nâmkijpem maipgapm sindem tiwep

¹² Notne penaŋ, ingat windenjin mtot indendeyet kwitnaŋ kwitnaŋ kukŋaŋbenj sokbemâgeyaŋ tapmezin. Âpme in kwileki nen mamananaj sokbemndain zenti sebet diŋdiŋ ku mbep.

¹³ In Kilais manâmkijpeipgapmti sek sindem egaŋ tiyenok in tiwep kataŋ oloŋen mamambep. Âpme maneti bam gilik zemkosâpmnen busatnaŋ temaŋmak sokbemkawaŋ beme amnaŋ eksâip kan keyet keŋ dolakŋaŋ nâmti segeyek mbep.

¹⁴ Kwitnaŋ kwitnaŋ kogok mimindame nâmbewenn Kawawaŋgalen Emetak Teŋ windenajmak egaŋ inmak tati keŋin mam imbelajaŋ bemindein keyepm in Kilais egat kwitnaŋ kwitnaŋ mti mame am notnaŋ ekŋenaŋ zemtalalat zet diindome in keyet nâme dolakŋaŋ bewe.

¹⁵ Inmagengatnaŋ ŋenaŋ am nen kume gakiwe mene ma kambu tiwe mene ma mobotnaŋ sakam ikŋak ikŋak mbe mene ma am notnaŋgalen kwitnaŋ kwitnaŋgat eyak mme keboŋgat sindem sawep beme sakambukŋaŋmak.

¹⁶ Keyepmti in Kilaisiyelen am mamaip keyepmti sek sindem indame in keyet nâme sakambukñaṅmak ku bewe. Kogok mimindawep beme Kawawaṅ sesewatpewep eneyet in indikmâtâti Kilaisiyelen am mamaip manzeip.

¹⁷ Nâip, Kawawaṅṅ am ṅeneyelen yaṅin msokbembeyelen kanaṅ ilak yaṅ bein. Ninmagen ṅeṅṅ yaṅbemti mmeti met bam am Zet Zapat Dolakñaṅ Penangṅat wisat mamip ekṅenmagen zemdelanṅ zenze mulup mti tosanṅin bekananṅ penaṅ indawe.

¹⁸ Kawawaṅgalen Zet Itnanṅanen zet ṅen kapigok tazin,

“An teṅ mamainanṅ Kawawaṅgalen zemdelanṅ zenze kanen kiṅgagat palen tabep. Am yomtonṅ Kawawaṅgalen Zet Zapat Dolakñaṅ Penangṅat wisat mti keṅ katik mamaip ekṅen Kawawaṅṅ ku aṅgalaṅindewe, yek penaṅ.” (*Totatatgalen Set 11:31*)

¹⁹ Keyepmti Kawawaṅṅ sisipeṅpeṅ inmagen sokbemindandayet nâme makozin beme ke ṅep penaṅ. Eganṅ ikñaṅ indam mge kogogapm eganṅ in ṅep indikdamuṅ mbeyet keṅin ma sekṅin egat betnanen ketalasim samti kwitnanṅ kwitnanṅ dolakñaṅ eganṅ nâmtikñaṅ min ke ewe tusumti mbep.

5

An ṅeṅṅ bembema sip kaikñaṅ ekṅengalen zet

¹ Ingalen an ṅeṅṅ bembema notnanṅ mamaip ekṅengat nolin neṅ kegogak an ṅeṅṅ bembema

ingat pigok diindoma nâit: Neŋ Kilaisiyaŋ sek sindem penaŋ tatime zikatn penaŋaŋ ekban. Ma neŋmak an ŋeŋaŋ bembe notnne in egaŋ gilik zem busatnaŋmak kobe kan keyet nin ekmak busatnanen mamayet zapat bewanup.

² Kawawaŋgalen am sipsip nembonŋ damuŋ mimi an in zemindendeŋaŋ kegoŋ ke ilinaŋgat keŋinaŋgat nânâŋak mbep amgalen zet palen yek. Ma mânep milawatmak bembeyet nâmti yek; mulup ke nâme ingalen penaŋ beme oloŋen palen mbep.

³ In am indikdamuŋ mimiyet zemindendeŋaŋ ekŋengat nâme topme mobotnaŋ ku tabep. Am sipsip nembonŋ ekŋen ŋeŋaŋ bemindamti mama mimi dolakŋaŋ mme am ekŋenaŋ indikti indamâbep.

⁴ Âpme bam maneti An damuŋ sambeyet ŋeŋaŋin keyaŋ koti in zilem kwilik waleletnaŋpiŋ tatat katikŋaŋ matazin keyaŋ miak indemti kwizet buŋamak mamayet mwatonzemindewe.

⁵ An sip kaik, in kegoŋak an ŋeŋaŋine ekŋengat kandeŋinan mamti zelin gawepuwep.

Nâip, Kawawaŋgalen zelaŋ kapigok zein,

“Kawawaŋaŋ am ilinaŋgat nâme mobotnaŋ mambein ekŋen mamtoindein ma am keŋin mtoti mamaip ekŋen Kawawaŋaŋ keŋ taolet omba mamimindain,”
(*Totatagalen Set 3:34*)

keyepmti in sambeyaŋ keŋ mtoti mama set ke etaŋ ime delaŋ zeme noline ekŋengat kandeŋinan mepmâbep.

6 Keyepmti in mama mimiñin mtoti Kawawañgalen betnañ windenañben keyet kandañan mambep. Âpme kan temañ danğowe kan keyet in mwatindewe.

7 Kawawañañ indikdamuñ dolakñañ mamin keyepmti in nukñañin sambe tatindain beme egat betnan beit.

8 In keñin kume kwaopme kaik mamti nâpeñ nâpeñ mambep. Kasañin temañ Sadañ egañ gazu gazu temañ keboñañ mebekoti an pi ma pi wilikbi zemti ñandepen mamain.

9 Sadañañ tetimindiksât kopme ekti ku kuñzuñbep nâmkîñpepen katikñañ bemtabep. Enenogat msat sambe Kilaismagen noline tapmelip ekñañañ nukñañ sepem kwep in tatip kekok ke in nâit.

10 Kawawañ ek keñ taolet toñañ egañ Kilais egat pembenañgapmti in ikñañgalen busatnañ temañmak keyet keñan ikñañmak kwesiñ kwesiñ mamayet indakumtetime kobien. Keyepmti in sek sindem kan belaknik bugan timobep yañ bam naman egañ zekâkât mimndemti keñ sewak zet zemti gwatnañ mimindemti ikñañ mwatonzemindewe.

11 Kawawañ ek winde temañmak mañgeyañ mamti mamobe keyet sesewatpene. Ke penañ.

Zet zemdelañ zenzenañ

12 Neñ Pita ingat zezapat meluwañ pemkwepmañ kumti Silasiyet betnan bema mkozin. Neñ egat nâma nâgât notn penañ bein. Zet zapat meluwañ kapiyet ingat keñin mbuteteyet nâyañ ma Kawawañgalen keñ taoletnañ mamimindain

keyet eyo nâmti kuyap. Kogogapm in egalen keŋ taolet keyet palen wetekumti mambep.

¹³ Neŋ Babilon* mkaen am nâmkĩŋpepeŋinmak talip nin ma in temakwep Kawawaŋaŋ ombemndeye. Âpme nin sambe egalen maŋge mamanup nin in indamukumindenup. Ma nemun, Mak, egaŋ kegogak indamukumindein.

¹⁴ In Kawawaŋalen am keyepm notn notn mti bet butem aiwep. Kilaismagen wetekumti maip inmagen keŋ sewakŋaŋ wemti weweyet mandunduyap.

* **5:13:** Babilon mka Lomamka temaŋgat kwitnaŋ ŋen be-mzemkukuaŋ enenogat am nâmkĩŋpepeŋin megaŋ nukŋaŋ sepem ikŋak ikŋak tiwien ke Babilon msalen keboŋ ke.

Kawawangalen Tâtâ Alakṇaṇ
The New Testament in the Nabak Language of Papua
New Guinea
Nupela Testamen long tokples Nabak long Niugini

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

ea68a902-358a-5c72-82de-a583fc4809e7